

EEBBek Kubako diplomatikoa atxilotzeko mehatxua egin dute, herrialdea utzi ezean

Pribilejioak eta inmunitatea galduko ditu datorren larunbateko 18:30etan

Erredakzioa / Donostia

Estatu Batuetako Estatu Idazkaritzak atzo adierazi zuenez, espioitza egotzi dioten Kubako funtzionarioak Vienako Konbentzioak esleitzen dituen pribilejioak eta inmunitatea galduko ditu larunbateko 18:30etan, Estatu Batuetatik alde egin ezean.

ONDORIOZ, James Rubin Estatu Batuetako Estatu idazkariak adierazi zuenez, «Kubako funtzionarioa Estatu Batuetako legeen menpe geratuko da, eta, atxilotzeko arrazoirik izango bagenu, atxilotuko genuke». Izan ere, Estatu Batuek astebeteko epea eman zioten larunbatean Kubak Washingtonen duen funtzionario bati herrialdetik alde egiteko, espioitzan aritu delakoan.

Kubako Gobernuak, ordea, ukatu egin ditu berriz ere Estatu Batuek Kubako zenbait funtzionarioen kontra egindako espioitza salaketak, atzoko *Granma* egunkariako editorialean adierazi zuenez. «Estatu Batuetako Gobernuak ondo daki gure Washingtongo Interesen bulegoak ez duela inolako espioitza lanik egiten», zioen atzoko *Granma*-ren editorialak,

Era berean, egunkarian azpimarratzen zenez, salaketak asmakeria hutsa dira. «Frogatuko balute gure Interesen Ataleko funtzionarioen baten Estatu Batuetako Inmigratzio eta Naturalizazio Zerbitzuko funtzionario bat erreklutatu zuela Kubaren aldeko espioitza lanak egiteko, prest geundeke Kuban auzipetze-



Elian Gonzalez haur kubatarra, Negra txakurrarekin jolasean, Miami senideen etxean.

ko, diziplinarik gabeko ekin-tza larria egiteagatik».

Estatu Batuetan bertan ere eztabaidatzeko prest daude Kubako agintariak: «Funtzionarioa kaleratu ordez, Estatu Batuek onartu behar lukete auzia bertako auzitegi federal batean argitzea».

Eliani buruzko auzialdia, atzeratuta

Bestalde, atzo atzeratu egin

zen Elian Gonzalez haur kubatarra Miamin geratzeko haurraren Estatu Batuetako senideek hasitako auzibideko bista, kasua daraman magistratua gaixorik jarri baita.

Ondorioz, beste epaile baten zuzenduko du martxoaren 6ko astean egingo den saioa: Michael Moorek. Orduan erabakiko da ea auzitegi federalak eskumenik duen haurraren senideek jarritako errekurtsioa aztertzeke.

Hezbollah akordioak urratu dituela dio Rossek

■ *Palestinaren auzian parte-hartze handiagoa eskatu dio Bruselari*

Efe / Jerusalem

DENNIS ROSS EEBBek bitartekariak atzo adierazi zuenez, Hezbollah gerrillak ez ditu 1996an Israelekin sinatu zituen akordioak bete. Israelgo Atzerri ministro David Levykin bildu ondoren egin zituen adierazpenok atzo Rossek. Israeldarrek Libanoko hegoaldean okupatzen dituzten lurraldeetan Israe-

len eta Hezbollahen arteko liskarrak etetea hitzartu zuten bi aldeek 1996an. Otsailaren 8an Israelen elektrizitate postuak bonbardatu zituen, Hezbollah sei soldadu israeldar hil zituelako.

Libanoren eta Siriaren arteko bake akordioaren mesedetan, Ehud Baraken Gobernuak palestinarrekin egin behar dituen negoziatioak bigarren mailan utziko

dituen beldur dira palestinarrek, Rossen ustez.

Bestalde, Europako Parlamentuko lehendakari Nicole Fontainerekin bildu zen Ross. Bere ustez, Bruselak presio egin behar dio Israeli «palestinarekin sinatu zituen akordioak betetzeko». Jasser Arafat PANeko lehendakariarekin ere bildu zen, eta Rossengandik «ideia berriak» espero dituela esan zuen horrek.

Borroka ugari izan dira azken egunotan ELNrekin negoziatzeko eremu berezian

■ *Gutxienez 70 lagun zendu dira gerrillarien eta paramilitarren arteko borroketan*

Agentziak / Bogota

KOLONBIA iparraldean, Sucre eta Bolivar departamendu inguruetan, borroka gogorak gertatzen ari dira ELN Askapen Nazionalerako Armadako gerrillarien eta paramilitarren artean. Borroka horien ondorioz hildakoak 70 direla adierazi dute Kolonbiako Fiskaltzaren inguruko iturriek.

Hain zuzen ere, borroka gertatzen ari diren inguru horixe desmilitarizatu nahi du Gobernuak ELNrekin elkarriketa prozesu bat abiatzeko. Hala ere, eskualde haietako zenbait sektore «bizikidetza eremu» hori sortzearen kontra daude, eta Gobernuak ordezkariak haiekin negoziatzen ari dira. Azken egunotako borrokek, gainera, lehen baino zailagoa egin dute bizikidetza eremua sortzea.

